


## ALAHADY faha-4 KAREMY - TAONA D2022



**« Ilay ity mandray ny mpanota sy miara-mihinana aminy » (Lk. 15: 2)**

Ry Kristianina havana, izao no andro tsara sy androm-pahasoavana hibebahantsika ka hanatonantsika an'Andriamanitra, fotoana hiekentsika heloka ka hohavaozin'Andriamanitra ny fo amam-panahintsika, ho lasa olom-baovao isika, izany no andrandraintsika amin'ny Paka, izany no antenaintsika sy irintsika amin'izao Sinaody faha-7 atrehintsika izao ary iombonantsika amin'ny sinaody eran-tany faha-16.

Nobanjinintsika tamin'ny Alahady lasa teo fa tsy maintsy mibebaka isika miady amin'ny ratsy mikiky ny fiainantsika raha nandinika ny niseho tamin'ny vahoakan'Israely. Ireny zava-mitranga ireny, ireny loza ireny tsy hoe Andriamanitra mahatonga azy ireny fa fananarana ho antsika, hanampy antsika hiaiky fa ao amin'Andriamanitra ireny ihany no tena hasambarana, Andriamanitra ireny no loharanon'Aina. Amin'izao Alahady fahaefatra amin'ny Karemy izao dia manambara fa efa akaiky

tokoa ny Paka, I Jesoa nandalo tamin'ny ratsy indrindra dia ny fahafatesana nefa nitsangan-ko velona. Raha miara-maty Aminy amin'ny fahotana isika dia hitsangana hiaraka Aminy. Paka hitondra aim-baovao ka hanova ny fifandraisantsika samy antsika, ny fifandraisantsika amin'ny zava-boahary, ny fifandraisantsika

Vakiteny I : Jôh. 5, 9a. 10-12  
Tononkira : Sal. 33, 4-5. 6-7  
Vakiteny II : 2 Kor. 5, 17-21  
Evanjely : Lk. 15, 1-3. 11-32

amin'Andriamanitra. Ny fanoharana ataon'I Jesoa amintsika amin'ny Evanjely androany, Lk15 dia matetika fintinintsika amin'ny hoe tantaran'ny zaza mpandany. Ny tena lohateny marina anefa dia Andriamanitra tsy lany fitiavana ka manambara fa Andriamanitra Ray be famindram-po, izany no tian' I Kristy ambara amintsika eto. Na manao akory na manao akory ny toetrantsika, Andriamanitra tsy lany famindram-po, izany no Andriamanintsika, Ray be famindram-po. Raha manatona Azy isika dia Izy no mialoha lâlana antsika mandrakariva. Izany no foto-pampianarana tian'ny Eglizy ho tsapantsika amin'izao Alahady faha-4 ny karemy izao.

Tsara nymanamarika fa ao amin’I Md Lioka ihany no ahitana an’io fanoharana io ka mahatonga ny maro miantso ny Evanjelin’I Md Lioka ho Evanjelin’ny Famindram-po.

Na inona ny toetrantsika, na manao akory ny toetrantsika dia vonona Andriamanitra handray antsika, handrotsaka ny fahasoavany amintsika.

Ny evanjely androany dia mampibaribary tsara ny tena toetrantsika olombelona dia ny fandanianiam-poana sy ny avonavona, fiheverana mahavita tena. *“Nisy lehilahy anankiray nanan-janaka mirahalaha, ka hoy ilay zandriny tamin-drainy: “Dada ô, omeo ahy ny anjara fananana tokony ho ahy”. Dia nozarainy tamin’izy roa lahy ny fananany. Nony afaka andro vitsivitsy, dia nangonin’ily zandriny ny fananany rehetra ka lasa nankany an-tany lavitra izy, nandany ny fananany tamin’ny fitondran-tena ratsy. “*

Tsy nitsahatra nandany ny fananany ilay faralahy. Isika olombelona dia tahaka azy koa satria matetika mandany ny fahasoavana omen’Andriamanitra antsika ary lanilanintsika amin’ny zavatra tsy misy antony. Manana ny toetran’ily zanaka lahimatoa koa isika satria mifanaratsy sy mialona fa tsy mitady izay iombonana. *“Fa hoy ny navaliny an-drainy: “Indro efa ela no nanompoako anao, ary tsy mbola nandika ny didinao iray akory aho, nefa tsy mbola mba nomenao zanak’osy iray akory hifaliako amin’ny sakaizako; fa nony tonga kosa io zanakao io, izay avy nandany ny fanananao tamin’ny vehivavy janga, dia namonoanao zanak’omby matavy izy”.*

Mananatra antsika i Kristy amin’izao Alahady izao amin’ny alalan’ity fanoharana ity mba hiova isika satria samy toetrantsika olombelona ny toetran’ily faralahy mpandany sy toetran’ily lahimatoa tsy mitsahatra manaratsy ary mihevi-tena ho mahavita tena. Matetika isika mihevitra fa tsara ny ataontsika. Toetrantsika ireo rehetra voalaza ireo. Ireo ny fahotana manapotika ny fiainantsika araky ny voalazan’I Papa François tamin’ny hafatra amin’izao Karemy izao. Noho izany samy mila fibebahana tokoa isika ka tsara ho tsapantsika izany amin’izao Alahady faha-4 amin’ny karemy izao. Raha tanterantsika ny tena fibebahana marina dia faly mandray antsika tokoa Andriamanitra.

Ambaran’ny vakiteny voalohany ny fisantarana sahady ny Paka, mananatra ny vahoaka I Josoe, ny amin’ny fomba fankalazana ny Paka. Mino aho fa efa niomana sahady toy izany koa isika na amin’ny litorjia izany, na amin’ny fontsika tsirairay avy. Izany izao Sinaody atrehintsika izao hanomanantsika ho OLON-DEHIBE AMIN’NY FINOANA. Tsarovy tokoa ry Kristianina havana fa izay no ataontsika amin’ny sabotsy masina raha manavao ny toky tamin’ny Batemy. Manambara fa misy dingana vaovao indray irosoana amin’izay maha Olon-dehibe amin’ny finoana. Tena mifaningotra amin’ny fiomanana ny Paka ny Sinaody. Koa anisan’ny fototra amin’ny fiomanana amin’ny Paka ilay ambaran’I Jesoa amin’ny evanjely, lalana mitondra amin’ny Paka. Izany hoe isika hiverina amin’Andriamanitra no tsara indrindra. Ilay zaza mpandany dia nandany ny fananany rehetra ka lasa tsizarizary ny fiainany, potika tahaka izany koa isika satria lany ny fahasoavan’Andriamanitra tao amintsika. Isika mitevy ala ireny, isika manimba ny zava-boaary ireny dia manapotika, mandanilany ny harena amin’ny tsy misy dikany. Aoka isika hiaro ny tontolo iainantsika, hiezaka hamboly hazo, hitady fomba hanatsarana ny tontolom-piainantsika.

Tsara ho fantantsika koa ny dikan’ny hoe *“kiraroy ny tongony, asio peratra ny tanany”*. Mba hiova ny fombantsika ka hiala amin’ ireny fomba taloha ireny izay manapotika antsika sy ny

fifandraisantsika amin'ny zava-boary, amin'ny tontolom-piainantsika, amin'Andriamanitra Ray. Marina fa mahavelona ny teo aloha fa mila fomba famokarana bebe kokoa isika, izany ny atao hoe génération de bâtisseurs. Raiso ny fampianarana ataon'ireo manam-pahaizana mba hamokatra bebe kokoa na lavanila, na kafe, na jirofo, na vary. Raiso ny fampianarana fa izany no maha génération de bâtisseur antsika. Izany rehetra izany ny vokatry andrasantsika amin'ity Sinaody ity. Tsy fiaraha-midinika ambony latabatra fa araka ny voalazantsika hitondra FIOVAM-PENITRA MAHERY VAIKA=CHANGEMENT RADICAL DE COMPORTEMENT. Hitondra amin'ny tena fihavoazana amin'ny lafiny rehetra na ara-panahy, na ara-batana, na ara-tsaina. Tsarovy fa raha nitsangana tamin'ny maty I Kristy dia ny olona manontolo sy ny olon-drehetra no niara-nitsangana taminy. Io koa no irintsika amin'izao Paka izao sy amin'izao Sinaody izao.

Havaozy ny tontolo iainantsika, aza manao tahaka ny lahimatea isika ka hifanaratsy sy mihevitra ny hahavita tena samirery fa be famindram-po Andriamanitra, olo araiky amintsika.

Aoka isika hampanjaka ny marina, tsy hialona, tsy hifamono amin'izay miova ho tsara ny fiainantsika. Raha te ho génération mpanorina tokoa isika dia aoka ho marina, hifanasoa, hifanatsara, hikatsaka mandrakariva ny soa iombonana.

Mananatra antsika koa i Md Paoly ao amin'ny vakiteny faharoa "*mihavana re amin'Andriamanitra*". Miova ny fiainantsika raha mihavana amin'Andriamanitra isika, raha Andriamanitra no ataontsika eo anivon'ny fiainantsika, izany no atao hoe Paka. Raha tiantsika ho Paka tokoa ny fiainantsika, aoka isika hametraka an'Andriamanitra eo anivon'ny fiainantsika.

Mihavana re amin'Andriamanitra fa izao no androm-pahasoavana. Aoka isika hihavana amin'Andriamanitra ka ho zary zava-boahary vaovao ao amin'Andriamanitra, miova ny fifandraisantsika amin'ny zava-boahary, miova ny fifandraisantsika amin'Andriamanitra, olon'Andriamanitra isika araky ny voalazan'i I Md Paoly hoe :"*mpandraharahan'Andriamanitra izahay ka manao antso avo amintsika mba hihavana amin'Andriamanitra*".

Ry Jesoa Tompo ô, izao tokoa ny androm-pahasoavana, nampibaribarinao fa Ray manankarena amin'ny famindrampo Andriamanitra. Izahay no mandanilany ny fahasoavana fa Izy tsy lany famindrampo, miandry anay Izy, mialoha lalana anay. Enga anie hananaraotra izao fotoana izao izahay hanatona anao bebe kokoa ka hihavao tokoa ao aminao.

Ry Jesoa Tompo, lanao no mampahafantatra anay fa lalina tokoa ny fanehoan'Andriamanitra ny famindrampo-pony ka ampio izahay hatoky ny fitiavany sy ny famindrampo-pony ka tsy hisalasala hanatona ny sakramentan'ny fampihavanana mba hihavao ny fiainanay ka hahatonga anay ho Eglizy Olona Velona sy Eglizy Tranon'Andriamanitra hanjakan'ny rariny sy ny hitsiny, ka hitondra fiainambaovao, ho Paka feno fiadanana ho anay izao Paka omaninay izao. Masina Maria Renin'ny Famindrampo, mivavahà ho anay mba hahay hanaraotra izao fotoana kely sisa izao hankalazana ny Paka ka hiverina amin'Andriamanitra. Tantano izahay fa indrindra ireo mbola misalasala ho any amin'I Jesoa tahaka ilay Zaza Mpandany ao amin'ny Evanjely. Md Josefa, mivavahà ho an'ny raimpianakaviana, ho an'ny Mpitondra isan-tsokajiny, hahafoy tena ka ho mpanompo tokoa fa tsy ho tompoina, hahay handresy lahatra ka hitarika amin'ny tena fampandrosoana marina amin'izao andro sarotra izao. Amen